

Prof. dr Božidar Stavrić, redovni profesor
Van. prof. dr Aleksandar Miljković, vanredni profesor

Recenzija knjige:

“MIKROEKONOMIJA”,

autori: Sanel Jakupović, Željko Baroš, Vladimir Stojanović

Knjiga pod naslovom “MIKROEKONOMIJA” napisana je na 279 stranica glavnog teksta, formata B-5, povezano mekim povezom, pisana je latinicom. Tekst knjige disponiran je, pored uvodnog dijela, u četrnaest tekstualnih dijelova, i to:

Prvi dio, POJAM I RAZVOJ MIKROEKONOMIJE,

Drugi dio, MIKROEKONOMSKI TEMELJI ADAMA SMITA I DAVIDA RIKARDA,

Treći dio, NAUČNI DOPRINOSI MIKROEKONOMSKOJ ANALIZI,

Četvrti dio, TRŽIŠTE,

Peti dio, CJENOVNA ELASTIČNOST TRAŽNJE I PONUDE,

Šesti dio, TEORIJA KORISNOSTI,

Sedmi dio, TEORIJA PROIZVODNJE,

Osmi dio, ANALIZA TROŠKOVA,

Deveti dio, TRŽIŠTE I SAVRŠENA KONKURENCIJA,

Deseti dio, NESAVRŠENA KONKURENCIJA,

Jedanaesti dio, MIKROEKONOMIJA RIZIKA I NEIZVJESNOSTI,

Dvanaesti dio, TRŽIŠTE RADA, ZEMLJA I KAPITAL,

Trinaesti dio, DRŽAVNA INTERVENCIJA U FUNKCIJI ELASTIČNOSTI,

Četrnaesti dio, JAVNA DOBRA I EKSTERNALIJE.

Knjiga obrađuje mikroekonomiju u njenim različitim sadržajnim aspektima.

U prvom dijelu knjige (stranice 10-37) autori čitaoca uvode u materiju kojom se knjiga u ostalim poglavljima iscrpno bavi, definišući osnovne pojmove i elemente, počevši od pojmova iz mikroekonomije i makroekonomije, ekonskih modela, ekonomske analize, uključujući ekonomsko zaključivanje, ekonomsko prikazivanje, povezanost varijabli i konstruisanje grafikona, pozitivne i negativne nagibe krivulja i upotrebu jednačina i, na kraju, dat je prikaz nastanka i uzroka velike depresije.

Drugi dio knjige (str. 42-62) autori posvećuju istorijskom nastanku mikroekonomske misli koja se zasniva na proučavanjima Adama Smita i Davida Rikarda. Osnovni pojmovi o teoriji vrijednosti, Smitov profit, kamata i renta doprinose potpunijem razumijevanju kapitalnog Smitovog djela Bogatstvo naroda.

U trećem dijelu knjige (str. 66-105) autori opisuju karakteristike naučnih doprinosa mikroekonomskoj analizi brojnih autora, kao što su naprimjer granična analiza Thuenena, matematička analiza Cournota, marginalna analiza Gossena, analiza kapitala Eugen Boehm-Bawerka, subjektivna analiza Karla Mangera, internacionalna ekonomska analiza Wiesera, analiza optimuma Vilfreda Pareta, te analiza vremena prema tržištima Alfreda Maršala.

U četvrtom dijelu knjige (str. 109-124) autori obrađuju pojam i klasifikaciju tržišta, njegov razvoj i krivulje ponude i potražnje, te stanje tržišne ravnoteže.

Peti dio knjige (str. 127-140) autori posvećuju cjenovnoj elastičnosti ponude i tražnje. U ovom dijelu navode i objašnjavaju cjenovnu elastičnost tražnje i formiranje ukupnog prihoda i grafički prikaz cjenovne elastičnosti. U odnosu na promjene na tržištu autori tematiziraju uslove ravnoteže potrošača, analiziraju indiferencije potrošača i budžetski limit.

U šestom dijelu knjige (str. 145-149) autori opisuju i analiziraju osnovne karakteristike teorije ponašanja potrošača, teoriju korisnosti i marginalnu korisnost.

Sedmi dio knjige (str. 152-178) autori posvećuju teoriji proizvodnje i prilažu objašnjenja krive proizvodnih mogućnosti, funkciji proizvodnje na dugi i kratki rok, proizvodnju sa jednim, dva i više proizvodnih faktora, te njihovom optimalnom kombinacijom i upotrebom. Na kraju ovog dijela knjige prikazuje se značaj i uloga efekta supstitucije i tehnoloških promjena na proizvodne mogućnosti.

Osmi dio knjige (str. 182-190) obrađuje analizu troškova sa aspekta utvrđivanja graničnih troškova i maksimiziranja profita.

U devetom dijelu knjige (str. 194-208) autori predstavljaju tematski sadržaj tržišta i savršene konkurencije. U težištu pažnje autora su funkcije tržišta savršene konkurencije, tržišna ravnoteža potpune konkurencije, kao i modeli savršene konkurencije, uzimajući u obzir dugoročnu ravnotežu i gubitak, tehnološku i alokativnu efikasnost.

Deseti dio knjige (str. 214-228) bavi se pitanjima nesavršene konkurencije, tj. prije svega oblicima monopola i monopolističke konkurencije, sa izvedenim modelima monopola, krive tražnje monopola. Prikazuju se i alokativna efikasnost prirodnog monopola i njegovo cjenovno određivanje u uslovima monopolističke konkurencije. Na kraju ovoga poglavlja autori su obradili i oligopol.

U jedanaestom dijelu knjige (231-236) autori knjige posvećuju pitanjima mikroekonomije rizika i neizvjesnosti kroz obradu i primjenu teorije igara. Dvanaesto poglavlje knjige (str. 242-251) sadrži tematske jedinice koje obrađuju tržište rada, zemlje i kapitala u odnosu na efekat supstitucije i promjenu tražnje, gdje se prikazuju specifičnosti tržišta rada u uslovima potpune kao i nepotpune konkurencije. Na kraju poglavlja daje se prikaz diferencijalne i ekonomske rente.

Trinaesti (str.255-260) i četrnaesti dio knjige (str.263-277) posvećeni su pitanjima uloge i značaja državne intervencije u funkciji elastičnosti, kao i odnos javnih dobara i tzv.eksternalija u odnosu na optimalni obim proizvodnje i ponude javnih dobara.

Na samom kraju knjige (str.277-278) navedena je literatura kojom su se autori koristili pri pisanju ove knjige. Bibliografiju knjige čini: 38 knjiga, članaka i priručnika, 4 web izvora i 81 fusnote.

Autori su vrlo uspješno i selektivno, u funkciji tematskog sadržaja knjige, izložili, kritički ocijenili i sistematizovali dosadašnje naučne i empirijske spoznaje o mikroekonomiji u različitim aspektima koji su predstavljeni. Time su izradili teorijski okvir koji predstavlja podlogu i za buduća istraživanja mikroekonomskih modela i teorija.

Na osnovu izloženog zaključujemo da recenzirani rad autora: Sanel Jakupović, Željko Baroš i Vladimir Stojanović pod naslovom "MIKRO-EKONOMIJA", sadržajno i metodološki posjeduje sve karakteristike naučnog djela i predlažem da se isti u cijelosti i bez izmjena i dopuna objavi.

Banja Luka, 25. novembar 2010. godine

Recenzenti:

Prof. dr Božidar Stavrić,
Van.prof.dr Aleksandar Miljković,

